



BOND VAN DIE VERMEULEN FAMILIE
Langstraat 16 De Kelders Gansbaai 7220
Selfoon (+27) 082 585 7692
Web: www.vermeulenbond.org
Epos: vermeulenbond00@gmail.com

DIE MEULENAAR OKTOBER 2021 (Jaargang 22)

Voorwoord

Tydens die samestelling van DIE MEULENAAR was ons alreeds 565 dae vasgevang in die greep van die CORONAVIRUS pandemie hier in Suid-Afrika. Dit is duidelik dat die pandemie ons lewens onherroeplik verander het. Verder het die POPI wetgewing (Wet op die Beskerming van Persoonlike Inligting), wat 1 Julie 2021 in werking getree het, ook 'n wesenlike verandering teweeg gebring in die werkzaamhede, asook kommunikasie met al ons lede van die BOND.

Bond Ledetal en Nuwe Lede

Ons ledetal was aan die einde van 2020 79 lede en 5 vriende. Vyf lede het bedank of versuim om ledegeld vir 2021 te betaal. Ons bedank al ons lede wat so getrou hul jaarlikse ledegeld betaal en dan verwelkom ons ook graag ons nuwe lede soos hieronder aangedui. Ons vertrou dat jul verbintenis met die Bond aangenaam sal wees en tot wedersydse voordeel vir julleself en die Vermeulen Familie sal wees.

1. Barend Daniël (Bennie) Vermeulen van Postmasburg.
2. Deon Roelof Vermeulen van Arizona VSA
3. Ockert Cornelius Vermeulen van Bothasig Kaapstad.

Facebook Blad

Dit is aangenaam om te rapporteer dat ons Facebook blad vanaf 2020 se 581 lede gegroei het tot 637, 'n vermeerdering van 'n hele 56 lede in vergelyking met verlede jaar. Dankie aan Stoffel en die ander persone wat die administrasie van die facebookblad hanteer. Dankie ook aan ons facebook lede wat gereeld interessante inligting daarop plaas.

Webblad

Soos julle weet het ons 'n nuwe webblad <https://www.vermeulenbond.org> gekry met baie nuwe artikels en interessantehede. Ons wil veral alle lede versoek om foto's en inligting t.o.v. oudhede/aandenkings van Vermeulen voorsate wat in jul besit is vir ons te stuur vir plasing op die webblad onder die oopskrif Aandenkings.

Die webblad word maandeliks besoek deur ongeveer 65 persone. Vir ons Engelssprekende Vermeulens is ons webblad in beide Afrikaans en Engels beskikbaar. Behalwe die vorige uitgawes van Die Meulenaar

is alle artikels vertaal. Kliek op die tuisblad van die webblad op die Suid-Afrikaanse vlag vir die Afrikaanse weergawe en op die United Kingdom vlag vir die Engelse weergawe. Sien hieronder.



Die elektroniese weergawe van die 2019 opgedateerde geslagregister asook die gedenkuitgawe (gratis verskaf aan Bondlede) kan ook d.m.v. ons webblad afgelaai word indien daarvoor betaal is. Vir alle aankope sien ons webblad.

Geslagregister

Daar is nie meer kopieë van die geslagregister in boekvorm beskikbaar nie. Dit word nie voorsien dat die register weer gedruk gaan word nie en indien u hierdie boek besit, bewaar dit goed, aangesien hierdie geslagregister nog 'n gesogte versamelingstuk kan word.

Ek wil weereens 'n beroep op lede doen om verandering van jou familie inligting, familie foto's en enige staaltjies en prestasies van die Vermeulen familie aan ons deur te gee. Dit is die enigste manier wat ons kan verseker dat ons familie geskiedenis vir ons nasate behoue gaan bly. Dit is veral die inligting t.o.v. veranderings aangeteken die laaste aantal jare wat nie meer beskikbaar is nie en kan net verskaf word deur naasbestaandes self.

Die byhou van ons databasis het nog nooit gestaak nie maar gaan onverstoord voort. Help ons asseblief met hierdie belangrike taak. Op 30.06.2020 was daar 18179 name in die databasis van Dirk Cornelisz en 5245 name in die geval van Jan Willemesz aangeteken. Dit sluit byvoorbeeld ook eggenotes in wat nie Vermeulens is nie. Dit sluit ook 'n geringe aantal name in van Vermeulen's wat nie geplaas kan word nie. Op 30.09.2021 is daar 18290 name in Dirk Cornelisz se databasis en 5262 in geval van Jan Willemz.

Algemene Jaarvergadering (AJV)

Ons AJV is aanlyn gehou op 31 Julie 2021. In-diepte gesprek is gevoer oor die voortbestaan van die Bond. Daar word onderneem om 'n skrywe aan alle lede te rig ten einde hul insette te verkry. In die Voorsitter se Jaarverslag word daar aangedui dat die Bond 'n surplus van R188.00 getoon het vir die 2020/2021 finasiële jaar. Daar is ook 'n totaal van R2067.00 ontvang in die vorm van skenkings deur die lede. Oprechte waardering en dank aan almal vir die gebaar. Die Bond se finansies is egter kern gesond en het ons tans die bedrag van R36500 in ons spaarrekening.

Vermeulen Dag Vierung

Gedurende die AJV is daar dan ook besluit dat VERMEULEN DAG jaarliks op 1 Augustus gevier sal word. Alreeds verlede jaar op 24 September 2020 het hierdie idée op Facebook posgevat, en op 1 Augustus

2021 was daar ongekende reaksie op ons Facebook blad in hierdie verband. Baie dankie aan almal se positiewe bydrae.

Klub 80

Die Klub 80 bestaan tans uit 3 lede. Mag hul nog lank vir ons Bond en hul naasbestaandes gespaar bly. Ons bid hul seënwense en goeie gesondheid toe.

Dr. Madeline Pretorius Scott gebore Vermeulen D<2157> van Pretoria is tans 82jr oud.

Jacobus Daniël Vermeulen (Koos) D<8169> word op 19 Desember vanjaar 87 jr oud. Hy is ons oudste lid.

Hendrik Johannes Vermeulen D<7051> Hendrik is vanjaar 81 jr oud.

Agtergrond skets van Jacobus Daniël Vermeulen (D8169) en oorsprong van “Non-Pareil”

Johannes Lodewicus Matthys Vermeulen (Hans 1899 – 1957) het in 1921 vanaf Montagu, distrik Keisie, na De Doorns in die Hexvallei verhuis met sy eerste eggenoot, Christina Kriel, en is as plaasbestuurder van die groot wingerdplaas Non Pareil aangestel deur die eienaar Martin Van Niekerk, met twee plaasvoormanne onder sy beheer. Hans en Christina het drie minderjarige dogters gehad toe sy hom op die jeugdige ouderdom van dertig ontval in 1929.

Hans was vir vyf en twintig jaar die plaasbestuurder toe hy in 1946 'n deel van Non Pareil koop met die woonhuis waarin hy en sy tweede eggenoot, Anna Van Deventer met hulle gesin gewoon het. Hy het hierdie deel van die oorspronklike Non Pareil herbenoem na Uitkoms. In 1949 koop Hans die plaas Bethal by, in 1950 vir Westminster en in 1952 die bergplaas Sandhoek.

Jacobus Daniël (Koos)Vermeulen (D8169), gebore 19/12/1934, was as oudste van agt kinders, elf jaar oud toe Hans vir Uitkoms gekoop het. Nadat hy matriek voltooi het en ook die hoofseun was, het hy saam met sy pa op Uitkoms geboer. Na Hans se dood op 19/09/1957, Koos was toe drie en twintig jaar oud, het hy die plaas uit die boedel gekoop vir 10 000 pond en binne twee jaar die bedrag afbetaal met rekord uitvoerdruwe-oeste.

Koos is op Non Pareil gebore, het daar opgegroei en daar geboer. Non Pareil het letterlik deel van die Vermeulens geword wat deur Hans moontlik gemaak is met sy harde werk oor vyf en twintig jaar. Koos het op Uitkoms geboer tot 1965, toe hy die Hugenote plaas Les Chenés in Franschhoek gekoop en soontoe verhuis het.

Hy vertel dat gedurende ploegtyd op Non Pareil en Uitkoms, het die twee ploegperde reeds ingespan met die ploeg klaar gehaak vir hom gestaan en wag wanneer hy van die skool af kom. Daar is nie genade op 'n uitvoerdruweplaas nie. As dinge moet gebeur dan moet dit nou gebeur. Môre is te laat.

Met die oorgang van met ploegperde in die wingerde werk na trekkers, was die probleem dat `n trekker se agterwiele te wyd geloop het om in die smal wingerdrye te pas. Die wiele moes veel nader aanmekaar geskuif word en latere nuwe wingerde se rye is veel wyer geplant. Iets waarmee Koos as wingerdboer rewolusionêr was, was sy idee om iets te doen aan die swaar wielspuitpomp wat agter die trekker gesleep moes word en die grond vastrap. Sy idee was om weg te doen met die gesleepte spuitpomp met lang tuinslangpype en twee man wat stap en die wingerd met die hand bespuit. Hy het `n spuitpomptenk volgens sy idee laat bou wat sonder wiele slegs op die trekker se hidroliese lug/sak arms gemonteer was met spuite en `n blaser om die spuitstof onder druk tussen die wingerdblare in te forseer. Die lang spuitpype was nie meer nodig nie en die trekker kon nou ook baie korter met die hangende spuitpomp om die wingerdrye se hoeke draai en kon wingerdblokke vinniger en meer doeltreffend bespuit word.


Sy idee het oral begin posvat en die hangspuitpomp is oral begin bou en nog verder verbeter. Vandag, meer as sestig jaar later word die hangspuit oral in die wêreld gebou en gebruik.

Soos die toeval dit wil hê was Koos se buurman in Franschhoek `n Belg, ene Rick Crabbe, wat tydens die Uhuru-opstand in die Kongo met sy gesin na Suid-Afrika gevlug het. Sy plaas se naam was ook Non Pareil!

In 1996 toe ek hom vra wat hy dink die familie se leuse moet wees, was sy antwoord dadelik en sonder om daaroor te dink “Non Pareil!” Die leuse is as wapenspreuk saam met ons persoonlike familiewapen geregistreer. In 2001 tydens die stigting van die Bond, vra Izak Vermeulen vir my of my pa sal omgee indien die Bond se leuse ook Non Pareil sal wees. Ek het gaan vra en weereens sonder enige twyfel het hy gesê dat dit `n eer sal wees sou die Bond ons leuse wou gebruik. Die Bond se wapen is dus ook geregistreer met die Wapenspreuk “Non Pareil” as deel van die wapen.

Hy het net een versoek gehad en dit is dat die Bond in die toekoms nie sal vergeet waar die leuse vandaan kom nie en dit was nog nooit `n probleem nie. Ons dank dus aan die Bond van die Vermeulenfamilie vir die geleentheid om die oorsprong van die leuse in Die Meulenaar te kan weergee.

Die betekenis van NON PAREIL is soos ons weet “Niks beter nie” Dit word uitgespreek as “No Paree” en is `n ou vorm van Vlaams en Frans.



NON PAREIL



Bondswapen van die
Bond van die Vermeulenfamilie
Geregistreer 2001

Persoonlike wapen
J.L.M. Vermeulen
Geregistreer 1996




Persoonlike wapen
C.F. Vermeulen
Geregistreer 1997

Wapen: In blou, 'n goue skuinsgekruisde swaard en drietand; 'n silwer golwende skildhoof belaai, met 'n windmeul tussen twee skulpe, alles in rooi.


Helmteken: Op blou golwe 'n Zuiderzee-botter met gespande seile van natuurlike kleur en 'n rooi wimpel wapperend.

Wrong en dekkede: Blou en silwer

Wapenspreuk: PERSEVERA



Koos se ouerhuis op Non Pareil, die latere Uitkoms



Uitkoms • De Doorns • 1946 - 1965

NON PAREIL

Koos se ouers, Hans en Anna Vermeulen



Die gesin gedurende die oorlogsjare waarvan Koos die oudste is




Vlnr. Louis, Koos, Nico, Rita, Amanda en Piet. Voor sit Attie. Alex, die jongste, is nie op die foto nie.

Koos se eerste jaar op skool, 1941



Koos as agtienjarige jong man



Koos en Sinie Nel se troudag in 1958



60 jaar later in 2018



Sinie, (Gesina Catharina NEL) is oorlede in Februarie 2020.

Koos en Ouma Anna in 1960 met Koos en Sinie se eersteling, Johannes Lodewicus Matthys (Johan)



**Sy kinders
Johan en Elbé**



**Sy kleinseuns
Nielen, Johan en Maurits**



Sy agterkleinkinders

Christiaan Johannes



Heide Katrien

Fleur Marié



Les Chenés, die Hugenoteplaas in Franschhoek



Landbouweekblad se voorblad, 1980



Koog nou boere se baba

Koos Vermeulen op trekker
Les Chenés, Franschhoek 1980

Koos bewerk perskeboerde in Franschhoek

Vermeulen-heildronk

(Glasie word borshoogte gehou en almal teenwoordig sê saam)

Op hulle wat was

Op ons wat is

Op hulle wat kom

(Glasie word bokant kop gelig)

(Uitroep) **Non Pareil!!**

Glasie-inhoud word gesluk (Erkenning aan Johan (JLM) Vermeulen)

Die Bestuur wil al ons lede, alles wat mooi is toewens vir die toekoms. Bly veilig en gesond.